

■ COLUMNA

Questa stad baiv jau Coca-Cola

DA DAVID TRUTTMANN

Noss sentiments patriotics vegnan strapatschads. Be avant duas emnas avain nus votà davart la lescha militar. Ed ussa mettan ils turbos en discussiun gia il proxim tema brisant per la Svizra – l’iniziativa per l’adesiun a l’ONU.



La neutralitad è en privel – na l’ONU, sbrajan gia ussa ils predicaturs dal venderdi saira. E lur adversaris respundan: «L’indipendenza statale e politica da la Svizra odierna na vegn betg periclitada, l’organisaziun internaziunala da las naziuns unidas na metta betg en privel nossa libertad da decisiun e dad acziun, saja quai sin il nivel conterfederal, intercantun, transcommunal ed en las relaziuns famigliofilas...»

Basta, pli probabel ils 3 da mars 2002 avain nus ils resul-

tats sin ils moniturs. ONU «gea encunter ONU «na» – e quai tenor procents, chantuns, vegliadetgna, lingua, rösti, macaroni e capuns. Sche la Svizra entra en la ONU, alura din ils Australian: «Okay». Sche nus n’entrain betg, lura din ils Australian: «Okay».

Il cussegl dals chantuns ha tematizà ultimamain (21 da zercladur 2001) quella votaziun futura. Brändli, Maissen e cumpagnia han ditg «gea», cun 37 encunter 2 vuschs. Damai, a prima vista senza

gronda discussiun. Perfin il spelm erratic appenzellais, Carlo Schmid, ha vuschà «gea» questa giada. Las politicras premurusas ed ils politichers han però tuttina debattà durant passa trais uras davart l’eventuala relaziun ONU–Svizra, e quai a moda fitg precauta. Il tema da discussiun: «La neutralitad». Pli precis: «Co far chapir al pievel che la neutralitad na giaja betg a perder?» En vista a la votaziun vulan ils cussegliers e las cusseglieras far la segira. Tenor la devise: «Nus stuain tagliar las alas als adversaris!» Quels san dentant er sgular tip-top be cun l’ala dretga.

Ils politichers e las politicras vesan forsà fatg meglier d’observar a Berna ils placats da Coca-Cola che portan il slogan: «This summer lose your neutrality – life tastes good». Questa stad baiv jau Coca-Cola.

Midain in zichel tema: Tar l’ominusa votaziun da

l’ONU datti lura er gist in experiment. La populaziun da Geneva po votar quella fin d’emna per l’emprima giada per internet. Las votantas ed ils votants pon trametter lur cedels da votar tras ils cabels. Dumonda: Pertge gist ils Genevrins e las Genevrinas? Ma – quai è evidentissim. Quels din sobiso cun tschienta garanzia «gea» a l’adesiun a l’ONU. Tar ils Appenzelais fiss quai auter.

Suenter l’onn 2010 duessan lura er las Grischunas ed ils Grischuns pudair votar per internet. Fin là duess l’uschenumnà «e-voting esser introduci en l’entira Svizra. En Grischun vegni però segir a dar cumplacziuns. Jau manegel en connex cun la tscherna da la lingua per las paginas d’internet rumantschas. Rumantsch grischun u bregagliot? Ma quai è puspè in auter tema.